



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

Gemeinsam Äntwert vun der Ministesch fir Ëmwelt, Klima an nohalteg Entwécklung an der Inneministesch op d'parlamentaresch Fro n°7069 vum 25. Oktober 2022 vum éierewäerten Députéierten Här Marc Goergen iwwert "Équipe climat"

1. Wéi vill Gemengen am Land hunn ee Klimateam an d'Liewe geruff? Ass et méiglech, eng Lëscht vun dese Gemengen ze kréien?

D'Kreatioun vun engem Klimateam stellt eng essentiell Obligatioun am Kader vum Klimapakt duer, déi och sou am Klimapakt-Kontrakt tëschent der Gemeng an dem Staat festgehalen ass.

Aktuell sinn 101 vun 102 Gemengen am Klimapakt engagéiert.

2. Wéi vill Leit maachen insgesamt bei de Klimateamen mat?

Et läit am Kompetenzberäich vun der Gemeng fir hiert Klimateam sou zesummenzestellen, dass et och hire spezifesch Besoinen entsprécht. Dës kënnen vu Gemeng zu Gemeng variéieren, esou dass do d'Zesummesetzung vun de Klimateame vu Gemeng zu Gemeng liicht anescht sinn.

Laut Schätzunge vun der Klima-Agence, déi mat der Gestiou vum Klimapakt beoptraagt ass, sinn an der Moyenne 5-7 Memberen an engem Klimateam, sou dass iwwert d'Land gekuckt mindestens 650 Leit an de verschiddene Klimateamen engagéiert sinn.

3. Wéi gesäit d'Zesummesetzung vum Klimateam aus, opgelëscht no Gemeng:

- **Prozentsaz vun "normale" BiergerInnen,**
- **gewielte GemengevertriederInnen,**
- **pensionéierte Beamten,**
- **aktiv Beamten,**
- **intern an extern Expären?**

Am Klimateam sinn d'office de Klimaberoder an den designéierte Klimaschäfte Member.

Generell soll d'Klimateam sou breet a kompetent wéi méiglech opgestallt ginn: Politesch Vertrieder, Gemengebeamten, Bierger a Leit aus der lokaler Wirtschaft. Et soll doriwwer eraus och op en Equiliber a Bezuch op Geschlechter an Alter ugestriift ginn, genee sou wéi eng systematesch Abannung vun der Jugend (cf. Moosnamebeschreiwung: <https://pacteclimat.lu/fr/acteur-engage/les-mesures/organisation-interne/equipe-climat>).

Wann eng Gemeng am Audit ass, ass dat och ëmmer eng Geleeënheet fir Optiméierungspotential bei de verschiddene Mesuren – also och beim Klimateam – ze diskutéieren.

D'Gemenge geréieren d'Klimateame prinzipiell eegestänneg mat der Ënnerstëtzung vun hirem Klimaberoder, si sinn net verflücht déi genau Kompositioun zu all Moment um nationalen Niveau ze deklaréieren.

4. Vu wem ginn dës Gremien an der Reegel geleet, opgelëscht no Gemeng:

- **dem Buergermeeschter selwer,**
- **engem Schäfte/enger Schäfte,**
- **engem speziell dofir bezuelten externen Expär**



- **oder engem Bierger/enger Biergerin?**

D'Ëmsetzung vum Klimapakt-Prozess gëtt an all de Gemengen duerch e Klimaberoder begleet deen national duerch d'Klima-Agence, dem Gestionnaire vum Klimapakt, encadréiert gëtt.

Eng vun den Tâche vum Klimaberoder ass et, d'Gemeng initial bei der Zesummesetzung vum Klimateam ze ënnerstëtzen, d'Klimateamsëtzen ze leeden an d'Aarbechten ze koordinéieren. Dëst fënnt generell am Echange mam designéierte Klimaschäffen an den zoustännege Servicer aus der Gemeng statt, notamment dem Service technique an dem Service écologique.

D'Erfahrung aus de leschte Joren am Klimapakt huet gewisen, dass et wichteg ass, niewent de politeschen Entscheidungsdréier an den techneschen Experte vun der Gemeng, d'Bierger a notamment och d'Vertrieder aus der Privatwirtschaft beschtméiglechst anzebanne fir eng breet Allianz bei der Ëmsetzung vun de Klimapakt-Mesuren ze schafen.

5. Wéi oft sinn déi eenzel Klimateamen zënter hierer Schafung zesummekomm?

An der Reegel kommen d'Klimateame 4-6 mol pro Joer zesummen, wat och laut de Bewäertungskrittäre vum Klimapakt de Minimum duerstellt. Dëst an hirer integraler Kompositioun oder awer och a verschiddene méi kléngen Aarbechtsgruppen (z.B. zu spezifesch technesche Froen oder am Hibleck op d'Organisatioun vun enger Veranstaltung).

D'Dynamik variéiert en Funktioun vum Ambitiounsniveau an der Aarbechtsweis vun der Gemeng.

6. Wéi gëtt an de Sitzungen vum Klimateam den Ordre du jour bestëmmt?

Den Ordre du jour gëtt an der Reegel vum zoustännege Klimaberoder an Ofstëmmung mam Klimaschäffe respektiv de concernéierte Servicer aus der Gemeng zesummegeallt.

D'Basis bitt och den Aarbechtsprogramm am Klimapakt, deen d'Gemeng muss am Ufank vum Joer op der Basis vum Mesurëkatalog opstellen an och eng essentiell Obligatioun aus dem Klimapakt-Kontrakt duerstellt (d.h. eng Zougangsvoraussetzung fir en Audit kënnen unzefroen).

Fir méiglechst effizient ze schaffen, kommen oft verschidde méi kleng Aarbechtsgruppen aus de Klimateamen ervir, déi da spezifesch un deem engen oder aneren Themefeld schaffen.

7. Um wéi vill Auer fannen d'Sitzungen an der Reegel statt a wéi laang daueren se am Duerchschnëtt (opgelëscht no Gemeng)?

Well an deenen allermeeschte Klimateamen och Bierger engagéiert sinn, déi sech niewent hirer Aarbecht benevole engagéieren, fannen d'Sëtzen an der Reegel Owes statt. Doriwwer eraus fannen natierlech och nach Aarbechtsreuniounen tëscht dem Klimaberoder an de Servicer vun der Gemeng statt.

Niewent de Klimateame valoriséiert de Klimapakt awer och nach aner Participatiounsforme wéi z.B. déi lokal bzw. regional Klimapakt-Assisen, wou d'Bierger an och déi aner lokal Akteuren invitéiert ginn fir ënner anerem iwwer méiglech nei Moosnamen ze beroden, déi oft de Weekend stattfannen an och méi laang daueren, oder awer och méi projektsspezifesch Demarchen (z.B. Kreatioun vun enger



Energiekooperativ oder déi participativ Entwécklung vun enger Strategie an den Themeberäicher vum Klimapakt).

8. Wéi ënnerscheid sech d'Zesummesetzung an d'Aarbecht vum Klimateam vun de konsultative Kommissiounen, déi sech mam Thema Klima an Ëmwelt beschäftegen?

Wéi scho weider uewe beschriwwen gesäit de Klimapakt-Kontrakt mat de Gemengen eng Obligatioun par Rapport zum Klimateam vir a stellt Bewäertungskrittären zur Verfügung, mee iwwerléisst et awer der Gemeng wéi si op der Basis vun hire Besoinen dës Measure ëmsetze well.

Am Hibleck op dës Fro kann ee feststellen dass et Gemenge ginn déi zousätzlech zu enger Ëmweltkommissioun e Klimateam aberuffen an awer och Gemengen an deenen eng Ëmweltkommissioun d'Aufgabe vum Klimateam mat iwwerhëlt.

Aus Siicht vum Klimapakt ass et fir eng performant kommunal Klima- an Energiepolitik entscheidend insgesamt eng konsequent Gouvernance-Approche an der Gemeng ëmzesetzen déi sécherstellt dass déi politesch Entscheidungsdréier hir Verantwortung iwwerhuelen a sämtlech aner concernéiert Gremie wéi och Acteuren an de Klimapaktprozess systematesch mat agebonne ginn.

9. Sinn d'Ministeren der Meenung, datt an engem kommunale Klimateam normal BiergerInnen d'Majoritéit vun der Equipp misste stellen?

Wéi an den Äntwerte weider uewe beschriwwen ass et déi zentral Missioun vum Klimateam fir de Klimapakt-Prozess fachlech an der Gemeng ze begleeten, d.h. dës Equipe soll als Plattform déi verschidden Typen vun Acteuren regroupéieren déi gebraucht gi fir déi verschidden Themeberäicher vum Klimapakt ofzedecken.

Bierger wéi och Vertrieeder aus der Privatwirtschaft spillen heibäi eng wichteg Roll a sollen entsprechend am Klimateam vertruede si fir notamment och déi néidesch politesch Entscheedungen mat virzubereeden.

Niewent de Klimateame valoriséiert de Klimapakt awer, wéi weider uewen erkläert, och nach aner Participatiounsformen déi z.B. méi projettsspezifesch kënne sinn a wou d'Abannung un de Bierger och méi spezifesch ka stattfannen. An dësem Kontext besteet notamment eng spezifesch Konventioun mat der Struktur CELL (Centre for Ecological Learning Luxembourg) fir d'Gemenge beim Sujet Biergerbedeelegung am Kader vum Klimapakt ze begleeten. Dëst Joer waren oder si méi wéi eng Dosen lokal bzw. regional Klimapakt-Assisen geplangt.

Lëtzebuerg, de 6. Dezember 2022
(s.) Joëlle Welfring
Ministesch fir Ëmwelt, Klima an nohalteg Entwécklung